

四庫全書

史部

欽定四庫全書

欽定平定臺灣紀畧卷三十五

九月初五日已藍元枚奏言召募兵丁現在踴躍

應募者已經陸續挑選勇壯一千餘名照兵丁之例給予錢糧聞其內即有二百餘名係曾經從賊者但本人自愧知非不肯認此惡名伏思

皇上既予以自新之路貸其一死臣亦姑聽其隱秘惟是此等匪徒亦難遽信其無假冒投誠萬一有變

所關匪細仍嚴密稽查防範以保無虞至大甲溪岸裡社義民熟番先經臣差弁前去曉諭鼓勵隨經差弁帶同熟番潘明慈郡乃等八名義民首邱子標等十二名前來各愿勉力殺賊臣即賞以銀牌布匹令其同心奮勇禦賊嗣又據該處民番來報有賊攻擾臣經撥兵六百名又飭副將徐鼎士帶兵一千二百餘名又招募義民三千餘名同在大甲溪北駐劄而岸裡社熟番在大甲溪之南聲

勢甚是聯絡賊人屢次攻擾俱被官兵等殺退且該處路途頗平可與攻迫賊巢若與鹿仔港兩路夾攻實好機會但近聞賊目互相猜疑俱將各賊眷屬押入大里杙居住若官兵攻勦太急勢必抵死守禦一時恐難遽破轉費時日又防賊人佔踞斗六門必乘大兵進攻大里杙從西螺來抄鹿仔港難免有後顧之慮况鹿仔港現在西南沿海豐港至鹿場尖山北舖五十餘里約大小二百餘莊

經臣遣人分頭前去曉諭所有被賊焚燬村社亦搭蓋草寮暫行歸莊七月二十七八九連日大雨園地俱栽插耆耆而鹿仔港之東南溪底孩沙等莊離斗六門僅七八里該地民人亦有來求見佇望兵到各愿糾集鄉勇跟隨殺賊臣細籌情形明知斗六門係賊要隘勢在必爭必來抵死相拒然際此民心初安向義從官似當先乘此機會多帶官兵先劄西螺若斗六門一破正可痛加勦殺使

賊人心驚胆裂而我軍便得長驅直進似較大甲
溪更為要著臣已飛咨將軍臣常青提臣柴大紀
訂期於八月半間會同夾攻至漳州兵船經收入
鹿仔港有一千三百餘名其未到兵若早晚風順
亦必陸續進港臣正在整頓兵力前往攻勦斗六
門一得勝仗立刻由驛馳奏再查生番性如猿猴
登山涉水便捷如飛但各分種數每種或數十莊
社或百餘社不等皆有熟悉番性之人衆番皆聽

其呼喚臣細訪彰化以北生番有張鳳華能使生番信服當即諭令張鳳華前去曉諭各社生番擒殺賊匪自有重賞於七月二十八日張鳳華親姪張高飛前來面稟伊叔業經傳諭生番據衆番告稱先前係林奕文叫人來說大里杙山邊盡是大官員鹿仔港海邊俱是賊是以叫我去殺賊今知鹿仔港是官員大里杙是賊自然要殺賊該生番業於七月十二日殺阿罩霧賊三十餘人至彰化

以南生番聞有岸裡社熟番通事潘明慈為人誠實兼通生番當今傳諭該通事令其前往諄切曉諭嗣據潘明慈稟稱前往生番告以利害許賞花紅衆番社無不喜悅都說從前被賊哄了如今纔曉得虎仔港大里杙都是些賊將來必定擊來獻功苟得賊來戕害又可以邀重賞等語此等無知蠢類一經曉諭皆知踴躍樂從將見么庸無識匿之所不難即日就擒奏入

上命軍機大臣傳諭福康安常青李侍堯藍元枚曰諸羅被賊圍困望救甚切經柴大紀兩次請兵往援該叅贊自應帶領官兵星速前往策應鹿仔港距諸羅甚近該處被賊圍急藍元枚豈有不知之理况屢有旨催令自北而南接應諸羅計此時藍元枚早應接到何以摺內未曾提及又不速往援應乃轉稱現在知會柴大紀該處此時正在被圍望救焉有餘力與藍元枚會合夾攻斗六門之理且藍元枚摺內既稱

大甲溪岸裡社義民熟番聲勢聯絡該處路途頗平
可以攻迫賊巢又稱斗六門係賊要隘勢在必爭當
多帶官兵先劄西螺進攻斗六門以便長驅直進即
應酌定機宜普吉保駐守鹿仔港該叅贊親自帶兵
前往痛加勦殺以圖進取乃既不由大肚溪進兵與
徐鼎士會攻又不進赴斗六門奮力攻擊殲除屯佔
賊匪救援柴大紀而於大里杙賊巢又稱官兵若攻
勦太急賊人勢必抵死守禦一時恐難遽破是藍元

枚竟係中無定見株守鹿仔港徒擁兵自衛並無寸
進若鹿仔港果有賊匪攻擾藍元枚不能前進猶得
有所藉口該處現在並無賊人滋擾而藍元枚處添
調官兵又已厚集乃一味株守瞻前顧後並不挪移
尺寸耶看來藍元枚明知諸羅被圍緊急擁兵不救
徒以大甲溪斗六門等處轉輾推托以掩飾其株守
坐視之罪豈能惑朕藍元枚之祖父藍廷珍以一總
兵帶兵前渡臺灣勦除賊匪七日之內尅期奏績朕

軫念前勞是以將藍元枚屢加拔擢用至提督又以
伊係本省人必能深悉賊情畀以勦賊之任授為叅
贊並賞戴雙眼花翎藍元枚自應倍加奮勉效法伊
祖克繼家聲方為無負委任今自到鹿仔港後遲回
觀望一籌莫展即所稱曉諭生番令其擒賊獻功等
事皆不過藉詞文飾以為佔脚地步藍元枚受朕深
恩何得恇怯委靡若此若再仍前觀望按兵不動則
藍元枚即為任承恩之續况尤非若任承恩尚可推

兵少也著先嚴行申飭至常青亦屢有旨令其親統官兵速赴諸羅接應柴大紀乃自數月以來惟知零星添撥奏請添兵並未親往北路決機制勝所辦何事現在諸羅尚未解圍常青藍元枚既經貽誤於前當此兵力厚集之時正該將軍贖罪圖功之日亟應奮勇前進收效桑榆庶不致自罹重咎總之此時諸羅若無挫失即係常青藍元枚之福萬一柴大紀竟有不虞則常青藍元枚更何顏面立於人世不可不

慎也再藍元枚奏現在召募食糧民人一千餘名內
有二百名曾經從賊者但本人自愧知罪不肯承認
雖予以自新貸其一死但難以遽信等語此事最宜
留心若稍有可疑者即應立行誅戮勿使別生事端
以保無虞為要至福康安既經啟閱藍元枚所奏情
形即應將其支吾掩飾及福康安到彼如何措施之
處據實奏明何以並未附摺具奏福康安於此等處
豈不能見及若徒然啟閱仍默無一語則亦不必先

行閱視矣豈朕委任之意耶福康安到彼著將此次諭旨內指出各節面向藍元枚嚴加詰詢令其逐一登答仍嚴行查訪有無捏詞支飾據實具奏

初六日庚午藍元枚奏言臣於七月二十二日染患

痢疾病症至二十五日聞賊人來擾番仔溝親帶官兵前去堵殺行至中途因賊匪已退亦即回營是日大風猝受感冒漸覺疲倦八月初八日聞賊匪一由竹仔脚一由大肚溪一由柴坑仔三路來

犯仍力疾親帶官兵前去堵殺至收兵回營精神
愈覺不支現在不能起立飲食頓減伏思鹿仔港
為海口要地況現在漳州兵已到一千三百餘名
廣東已到四百餘名兵力已足正當迅速勦滅首
夥之際臣何人何心馬能安卧床褥調攝微軀茲
暫將一切官兵移交普吉保管束進剿一面飛咨
將軍臣常青速撥大員前來經理臣奉職無狀既
不能尅日擒渠又何敢抱疴戀棧伏乞將臣革職

軍前効力俟臺匪剿滅交部嚴加治罪奏入

上命軍機大臣傳諭福康安李侍堯曰藍元枚昨日奏到之摺係八月初六日拜發馳遞幾及一月因查常青上次所到奏摺係八月初五日拜發已于八月二十三日遞到何以藍元枚此次之摺至一月之久隨飭查沿途掛號發單係在未到蚶江以前海門耽擱十六日之久向來洋面雖以風信為憑即或間被風阻稍稽時日尚屬事之所有何遲至十六日之多海

面亦閩省所轄遇緊要文報該督等自必慎選員弁
船隻以便駛渡斷無聽其任意遲延之理着交李侍
堯嚴切稽查究係何處耽延遲悞是否實係阻風即
行據實覆奏此後務須隨時留心稽查嚴飭該管員
弁慎選夫船設法星速馳遞毋致稍遲再藍元枚處
現據奏稱漳州兵已到一千三百餘名廣東兵已到
四百餘名是兵力已盛且賊匪互相猜疑漸有渙散
之勢官軍正可乘機進剿乃藍元枚又因患病不能

辦理軍務實深焦切鹿仔港一路現駐重兵最為緊要藍元枚既經患病此時常青處亦無人可以派撥前往統轄福康安此刻已抵閩省接奉此旨即應星夜加倍兼程竟由蚶江配渡迅赴鹿仔港即帶領藍元枚所統官兵奮勇打仗接應諸羅或與徐鼎士會合夾攻大里杙惟當相機而行不必俟屯練及貴州兵到齊再行進發彼時若藍元枚病症不能痊愈所
有水師提督即令蔡攀龍署理蔡攀龍素為奮勇屢

經打仗出力是以特加擢任着福康安先行傳諭蔡
攀龍務須倍加奮勉殺賊立功伊現在自己前抵諸
羅即當由諸羅帶兵剿殺沿途賊匪打通道路徑赴
鹿仔港如彼時福康安尚未到蔡攀龍即督率官兵
奮力進剿不必等候福康安到彼始行進剿至藍元
枚自到鹿仔港後辦理一切尚為奮勉後因其擁兵
觀望並無寸進又不親往援應諸羅節經降旨飭諭
今藍元枚既稱患病難以支持然猶在番仔港竹仔

脚等處力疾打仗堵殺賊匪如果病症屬實其情殊可憐憫現已頒賞大小荷包以示軫念福康安到彼即傳旨賞給再藍元枚雖因病不能辦理普吉保自當帶兵進勦何得株守坐待並着福康安將普吉保有無畏怯觀望之處一併查明具奏

初七日

辛未

上命軍機大臣傳諭保寧李世傑舒常李慶葉琅玕孫士毅孫永清曰此時川黔兩省之兵自必陸續按起

前進但現在臺灣雖有浙閩調撥之兵接濟剿捕而
會合攻擊急需厚集兵力以期迅奏膚功計福康安
此時已可到臺灣督辦一切正須多兵調遣所有調
撥四川屯練降番及貴州之兵著保寧李慶棠務須
飭令後起帶兵員弁加緊行走愈速愈妙其川省之
兵行過湖北江南浙江等省貴州之兵經過廣西廣
東等省俱著各該督撫飭所屬於兵過之時俱妥為
照料速令加緊進行毋使稍有遲緩

上又命軍機大臣傳諭福康安李侍堯李化龍蔡攀龍
曰前據常青奏派令蔡攀龍帶兵一千六百名由海
道前往諸羅援應柴大紀此時蔡攀龍自己早抵該
處但計伊接奉前旨由諸羅前赴鹿仔港尚需時日
而藍元枚一路現在漳州兵已到一千三百餘名廣
東兵已到四百餘名又賊黨互相猜疑漸有潰散之
勢正是甚好機會而統兵大員忽值患病反覆思之
殊增煩懣因思李侍堯於八月初九日曾奏帶領續

調粵兵之總兵李化龍業已先到現催令該鎮帶領
已到之兵即日開駕速赴鹿仔港一路協勦等語是
李化龍此時早已帶兵前抵鹿仔港李化龍人尚明
白且曾經行陣如蔡攀龍即時不能前抵鹿仔港即
著李化龍署理水師提督事務並著鼓勵將弁等奮
勇出力相機攻勦不得因循株守致有貽誤其藍元
枚現在患病情形勿令賊人聞知致長奸計窺伺此
為最要至普吉保與藍元枚同駐鹿仔港藍元枚既

經患病又將官兵交伊管束普吉保即應將藍元枚
患病光景及現在如何督率官兵勦捕事宜詳悉具
奏何以並未據專摺奏聞伊雖至愚何至於此等處
亦不能見及耶普吉保著傳旨嚴行申飭現在不患
兵少所最要者乃統兵之人福康安到彼不必俟四
川屯練及貴州官兵到齊即先獎勵將弁奮勇進勦
不得因途次知藍元枚現已患病又稍存畏怯疑難
之見至鹿仔港現在各副叅遊擊等官俱係行伍大

員久隨藍元枚調度籌辦已有章程此時提督雖經
患病該員等正當各為國家出力免圖報効之時何
未見有一人同普吉保勦賊者福康安到彼即應鼓
勵在彼將弁統率新到官兵或會合徐鼎士直攻大
里找賊巢或竟率領官兵徑赴諸羅救援將沿途賊
匪痛加勦殺以期道路肅清軍威丕振

同日柴大紀奏言逆匪糾合南北賊衆滋擾鹽水
港鹿仔草等處圖截通府要路使文報不通糧餉

莫運以困諸羅縣城臣經撥遊擊楊廷麟守備黃象新等帶兵一千餘名駐劄鹽水港又撥千總陳邦材帶兵二百名駐防鹿仔草與鹽水港互為犄角又派遊擊邱能成帶兵二百五十名一路巡哨接應茲六月初九日探聞龍船窩莊等處有賊匪焚搶情事楊起麟同黃象新等於初五日黎明帶兵飛赴該處賊匪二千餘人迎敵隨督率弁兵施放鎗砲打死賊匪多人餘賊旋退旋來被大砲打

死百餘人賊衆敗走追趕十餘里殺死賊匪亦多
奪獲賊旗賊械等項惟番民怡皆一名受傷六月
初七日辰刻賊衆約有二三千人分路圍攻鹽水
港楊起麟督率弁民義民施放鎗砲打死賊匪二
百餘名賊敗追至後鎮地方殺死賊匪甚多奪獲
子母砲一門馬蹄砲一門鹿鎗竹牌及賊旗等項
黃象新由南趕至急水溪邊生獲賊匪鄭對一名
餘賊奔竄兵民間有傷亡隨將鄭對審明正法初

九日千總陳邦材武舉陳宗器報賊匪萬餘聚集附近各莊欲來攻鹿仔草乞撥兵救援隨撥遊擊李隆守備楊彰於初十日黎明帶領弁兵併黃奠邦吳正蘭等各義民飛往應援至竹仔脚大崙莊田洋遇賊匪六七千蜂擁而出亦有鎗砲抗拒官兵李隆督令施放鎗砲賊匪四面攻圍官兵義兵奮勇前禦打死賊匪四百餘名殺死賊匪二百餘名自辰至午打裂大砲二門賊衆抵死冲來官兵

義民奮勇鏖戰適遊擊邱能成帶領弁民亦至該處併千總陳邦材武舉陳宗器各帶兵丁義民併來夾攻又打死賊匪數百賊始逃散收軍遊擊邱能成等仍回鹿仔草把總郭得勝李松二員外委蕭富許飛鳳二員陣亡外委陳威一員未知去向陣亡併遺失兵丁陳興高等共一百三十三名陣亡義民鄭乾等七十名受傷兵丁劉國寶義民呂雲等五十名炸碎大砲一門打裂子母砲一門遺

失子母砲四門百子砲四門鳥鎗三十桿腰刀四
十八口單刀二口又六月十二日辰刻賊匪五六
千人由東勢角來攻鹿仔草遊擊卽能成帶領千
總陳邦材併兵丁義民向前抵敵用鎗砲連環轟
擊自辰至未打死賊匪多人奪獲子母砲竹營砲
共三門鳥鎗令旗竹牌斧頭等件生獲賊匪莊敏
等八名卽於軍前正法兵民間有傷亡再臣原帶
官兵一千九百三十名往諸羅克復城池續於四

月二十一日將軍臣常青派撥叅將潘韜帶兵一千餘名前來接濟共兵九千二百餘名除分派鹽水港鹿仔草防守以及陣亡外臣營盤止有兵一千餘名兵力單薄賊匪每來侵犯已咨請將軍臣常青再添兵應援又二十日巳刻賊匪萬餘蜂擁來攻諸羅四門營盤隨令官兵義民協力抵敵鎗砲齊轟臣往來各門營盤督戰自己至申打死賊匪計有數百名打裂大砲一門其東南北三處賊

匪俱已敗走惟西門外賊衆尚抵死冲來督令官
兵竭力鏖戰賊匪退而復來者三次義民似覺稍
怯臣隨飛調遊擊林光玉帶兵由東殺來兩處鎗
砲齊發用力夾攻各義民亦皆奮勇爭先鎗砲打
死賊匪三百餘名內執大旗賊一名騎紅馬賊一
名始四散遠竄因天晚收軍兵民傷亡者八十餘
名獲大旗一面上寫五個雷字四角寫天地日月
字樣又大旗一面奪獲竹牌皮牌等械二十一日

撥防鹿仔草遊擊邱能成稟稱溫州鎮魏大斌帶
兵一千六百名前往諸羅因大崙埔心等庄有賊
匪屯聚截路十八日即帶兵四百名諭令遊擊亦
帶水陸官兵併武舉陳宗器等義民隨往該庄剿
捕與賊打仗施放鎗砲打死賊匪甚多詎賊衆萬
餘四面圍來官兵義民拚命抵敵至申刻殺出重
圍遊擊左手中指被賊刀傷見骨坐馬前胸亦被
刀傷收兵回鹿仔草魏大斌所帶官兵陣亡千總

一員把總二員兵丁遺失一百五十餘名遊擊所帶官兵陣亡把總武成烈劉連陞二員外委包定邦一員水陸兵丁陣亡遺失共二百二十九名義民遺失三十餘名逆匪因官兵派守鹽水港鹿仔草諸羅營盤兵力單薄總兵魏大斌接濟之兵又不能到益肆鳩張圖侵縣城愈急臣竊思諸羅係四面受敵之地現今賊多兵少隨會商署諸羅縣陳良翼併武舉黃奠邦拔貢鄭天球等環營開溝

設險晝夜併工多方鼓勵官兵義民協力堵禦二十四日已刻賊匪萬餘分攻西北兩門營盤東南亦各有賊匪六七百人察看情形此係賊人詐謀牽掣東南意實專攻西北臣令各營大砲齊發賊砲亦與對放臣往來西北兩處親督鎗砲各兵按定准頭施放打死賊匪約共三百餘人賊衆猶冒死前來臣督率官兵義民奮勇鏖戰北門打死騎馬賊一名又打傷騎馬賊一名打裂大砲一門殺

死賊匪七八十名賊敗遠竄西門外賊匪雖被大
砲打死二百餘名尚不肯退復親帶鎗隊飛往協
力堵殺賊衆恃有鎗砲不特當面對打且分攻右
邊番社其番社界在西北之間早已撥外委賴連
陞帶鎗砲手五十名番弓箭手三十名在竹園內
埋伏賊匪將近鎗砲弓箭齊發傷斃賊匪十餘人
賊隨俱攏西門任我鎗砲轟擊竟然抵死不懼查
東南賊匪俱經叅將潘韜遊擊李隆林光玉等殺

退隨飛調遊擊李隆林光玉等帶兵由東殺來併力夾攻殺死賊匪百餘名至黃昏賊始退去定更時賊復逼近營盤與官兵對放鎗砲相持一夜至二十五日黎明賊衆復攻西門臣往來各營盤督戰俱用大砲轟擊南門外打死賊匪數十人其餘俱退東北兩門賊匪被大砲打死各二百餘人打死騎白馬賊一名騎黑馬賊一名隨率官兵義民奮勇追殺賊匪始退惟西門外賊匪愈殺愈多雖

經大砲接連打死無數仍然拚命來攻復分作二
起一由當面冲來與官兵對殺一由番仔港擁入
學舍傍牆圍內多鑿穴空放鎗打入營盤兵丁義
民多受其傷若用大砲轟擊儘可透牆斃賊因文
廟伊邇神所憑依未敢施放大砲查南門賊匪已
退隨飛調遊擊李隆帶兵前來夾攻鎗砲打死賊
匪百餘名打死騎馬賊二名殺死賊數十名申刻
賊衆四散奔逃值大雨收軍此兩日一夜與賊打

仗官兵不暇造飯俱係城內紳耆鋪民挑飯送各
隊伍併挑送涼水兵丁得不饑渴兵民傷亡者約
八十餘名奪獲馬匹旗牌長刀等項又二十八日
辰刻賊匪萬餘復來侵犯四門營盤臣來往各門
督戰飭令官兵義民抵禦至午刻打死賊匪三四
百人官兵義民奮勇爭先殺死賊匪百餘名東南
之賊先已敗去惟西北門外賊匪不退時臣在北
門外有見騎赤馬賊率衆冲來甚是鷓張即令放

砲立見人馬俱倒併打死賊匪數十人正欲追趕適叅將潘韜守備楊彪等報稱西門外賊勢猖獗數次逼近營盤官兵義民俱有損傷臣隨往援併調遊擊李隆林光玉等均到西門併力夾攻至申刻賊匪被鎗砲打死百餘人打裂大砲一門殺死賊匪數十名賊始四散遠竄生擒賊匪林再何水二名因傷重旋死戮屍獲旗牌長刀等項

同日常青奏言八月十六日親帶兵起程因恐賊

匪乘間侵擾府城是以密為預備定于十六日起程先令官兵揚言于十三日前往北路此言傳出果有賊匪五六千人潛伏竹箐窺探府城當經帶兵殺散若官兵往北路止留梁朝桂一人帶兵千餘駐守實屬可虞應俟廣東浙江駐防滿兵三千名一到即留一半守城常青恒瑞即帶領一半先剿殺南路賊匪再行往北接應諸羅

同日李侍堯奏言諸羅被圍日久芻糧鉛藥日少

一日甚為可慮此間滿漢兵登舟者不下八九千
總以風信不常連日停泊不能開駕直至十六日
始行放洋計目下當可到齊常青得此新兵或當
分兵駐守府城率兵前往打通諸羅道路臣前詢
問船戶陳榮昌據云聞得有牌腹村義民運糧接
濟諸羅城中等語若果如此則諸羅尚可堅守待
援至鹿仔港一路普吉保劄營在馬鳴山本月初
八日有賊來擾即率兵剿禦自辰至未賊猶不退

藍元枚遣遊擊琢靈阿帶兵接應賊始散散官兵
乘勝追殺斬獲甚多查漳兵二千久已起程其未
到之六百餘名不日亦即可到而左翼鎮總兵李
化龍帶領粵兵二千五百亦于十六日放洋兵力
驟增正可協力進剿旋接同知黃嘉訓稟稱藍元
枚于十八日身故等語藍元枚到鹿仔港後連絡
民番布置似有頭緒一旦身故羣情未免失所倚
恃適增調之粵兵漳兵計目下亦必全到則事機

尚可相接惟普吉保李化龍兩總兵恐難相統轄
府城既有滿漢兵新到想常青自必親自帶領赴
援諸羅恒瑞或須留守府城不能分往鹿仔港督
率臣一面飛檄普吉保李化龍務當和衷商度的
量一人駐守一人即統兵進剿斗六門等處與柴
大紀會合勿得各存意見以致悞事想普吉保等
亦決不因統率無人遂稍存觀望福康安海蘭察
等約計九月初間即可到廈門臣現已預備船隻

等項俟一到即可登舟所有糧餉火藥惟有寬裕
籌辦上緊運送以期應手不敢稍有遲悞均奏入
上命軍機大臣傳諭福康安常青李侍堯柴大紀曰柴
大紀所奏情形俱係七月以前之事業經常常青李侍
堯等先後俱奏而諸羅被賊攻圍以後常青又派蔡
攀龍等帶兵往援如何殺賊解圍之處尚未得有確
信現在諸羅被困緊急望援甚切常青等自應遵旨
帶兵親赴北路援應柴大紀而伊等又因府城存貯

糧餉火藥兼之難民甚多惟恐大兵起程後賊匪乘
間侵擾府城請俟浙粵駐防滿洲兵到後酌留一半
駐守府城帶領一半洗淨南路所辦亦覺未中肯綮
此項駐防兵三千前抵臺灣後軍勢壯盛正當乘其
銳氣以全力直趨北路今又以分派一半駐守府城
一半帶往南路剿賊是兵力又以分而見單但此時
常青等如已帶兵前赴南路果能將賊匪大加剿殺
擒獲莊大田恢復鳳山肅清後路俾無返顧之虞亦

屬甚善但必當奮力搜剿將屯佔賊匪殲戮無遺庶
不虛此一舉不可徒分兵力以致兩處耽延方為妥
善又據奏官兵若往北路後府城止留梁朝桂駐守
未免可慮一節常青既已見及于此自應令恒瑞同
梁朝桂固守府城營盤常青自帶兵徑趨北路自不
當祇令一總兵在郡城駐守也此旨到時竟應遵照
前旨令恒瑞駐守府城常青仍帶兵往援柴大紀為
是又據李侍堯奏藍元枚于八月十八日患病身故

覽之深為軫惜藍元枚自駐劄鹿仔港以來調度督率均屬奮勉出力後因其久駐鹿仔港未能統兵進剿又未往救諸羅曾經降旨飭諭此亦策勵之道不得不然今因偶患痢疾仍奮勉打仗竟至身故殊為可憫鹿仔港現駐重兵方圖進剿又賊黨互相猜疑漸有潰散之勢正是極好機會而叅贊大員忽因病故軍心不無惶怯將弁等不無懈弛觀望並恐賊人聞知藍元枚病故信息生心窺伺最為緊要李侍堯

所奏之摺福康安在途次已經啟閱自悉該處情形
惟當堅持定見及早馳抵該處整頓兵力奮勇進剿
倘福康安尚未能尅日前抵鹿仔港即應先發劄諭
以該叅贊雖經身故但官兵厚集聲勢壯盛福康安
現赴鹿仔港即日可到李化龍普吉保及將弁官兵
等務須倍加奮勇努力自効殺賊立功俾軍心鎮定
將弁等咸加奮勇其所調屯練及黔省兵現又有旨
催令該督撫等即速派調起程尅期進發以期早抵

軍營但此時鹿仔港續調之兵業已陸續到齊兵力已足福康安及海蘭察所帶巴圖魯侍衛等百餘人最為勇健尤足以一當千更可恃以無恐惟當就現有之兵速即統領進剿將來屯練及黔省兵到彼時俱係生力豈不更資剿殺賊匪耶至水師提督業經降旨令蔡攀龍署理又因蔡攀龍未能即抵鹿仔港是以令李化龍署理以期事權歸一今據李侍堯奏已經檄普吉保李化龍二人應留一人駐守鹿仔港

一人帶領兵攻斗六門與柴大紀會合想普吉保等
不敢因統率之無人稍存觀望等語自應如此辦理
廈門距鹿仔港不遠李侍堯之信早到李化龍普吉
保二人中何人駐守何人進剿自己早經商定即行
各據實馳奏又前因鹿仔港招集充伍民人內有二
百餘名係曾經從賊者難遽信其無假冒投誠之事
已有旨諭令留心防範倘有可疑者即先誅之今藍
元枚已經病故此事關係緊要並著福康安督同李

化龍普吉保等加意嚴防隨事稽查倘有心懷叵測者當即正法毋致別生事端

上又諭內閣曰官兵在諸羅城外剽殺賊匪紳耆舖戶挑送飯米涼水兵民得不饑渴又牌腹村民人復運糧接濟諸羅該處民人能各知大義踴躍奉公深堪嘉尚自當特沛恩膏以示獎勵着福康安常青李侍堯即行查明首先倡率之義民頭目一面奏聞一面酌給官職第念該處義民衆多若僅將頭目給官嘉

獎恩施猶未普遍前曾降旨蠲免臺灣本年應徵錢糧着再加恩將五十三年分臺灣府屬應徵錢糧亦概行豁免並着該將軍等即行普貼騰黃俾全郡民人咸知感激倍加奮免急公以副朕優獎義民有加無已至意

上又諭內閣曰福建水師營提督藍元枚于臺灣逆匪林爽文糾眾滋事以來屢統領將弁奮勇直前剿殺賊匪并籌畫一切皆有條理特降旨授為叅贊以示

獎勵昨據藍元枚奏染患痢症屢次力疾統兵勇往
堵禦復降旨賞給大小荷包用昭體恤茲聞病故深
為憫惻藍元枚着贈太子太保並賞銀一千兩以示
優卹
朕軫念勤勞優恤戎臣之至意所有應得卹典着該
部察例具奏

欽定平定臺灣紀畧卷三十五

欽定四庫全書

史部

欽定平定臺灣紀畧卷三十六
七

內閣中書臣沈颺覆勘

武英殿纂修中書臣彭元琬

欽定四庫全書

欽定平定臺灣紀畧卷三十六

九月初七日

辛未阿桂奏言

與福康安前在金川

軍營相處日以四十九年大同在石峯堡剿賊深

知其辦理軍務及臨陣克敵並非畏葸怯懦之人

此次前赴臺灣督辦其土見如何臣雖無由得知

但悉心揣度其夤緣添兵自為速於完事起見緣

逆匪林爽文等滋擾以來為時既久前後調往官

兵雖已不少然其中如福建本省兵丁竟難深信
即如該提鎮等遇賊打仗屢報多兵不知下落此
項兵丁豈盡死傷逃亡未必不因與賊同鄉遂爾
附從此外浙兵素又懦弱所可信者惟駐防滿兵
及粵兵二項統計不過一萬四千餘名現在賊匪
猖獗鴟張設福康安到彼後現有兵力尚不敷剿
捕維時再請添兵臺灣遠隔重洋往返動需數月
倘不能冬春歲事則臺地炎熱雨濕辦理彌形棘

手福康安身肩巨任思欲剋朝歲事故有預行調
備之請方今

帑藏充盈

皇上於辦理軍務從無靳惜且福康安請調之黔楚兵
六千名俱可由水路赴閩沿途應付似亦不至於
勞費再查鹿仔港距大里杙較近且聞臺灣彰化
以北產米較廣若北路打通糧運亦易辦理是官
兵由蚶江配渡往北進剿實為得力即臣前摺亦

曾請于虎仔坑等處分路進攻大里杙賊巢惟現在臺灣藍元枚駐劄鹿仔港所帶之兵本屬無多而撥給常青處續調之粵浙各兵此時皆已到彼至內地兵丁其新募者既未經訓練即舊有者均係挑選所餘福康安現在前往臺灣無兵可帶若由蚶江配渡而大兵俱在南路轉恐未能得濟臣愚以為目下急務總在打通諸羅為要諸羅一通則南北聲勢聯絡維時可南可北視賊聚集處所

或以全力專注或用分路夾攻搗穴擒渠蕝功自
易而就現在情形再四審酌福康安似宜仍由厦
門配渡以便統率大兵前往諸羅于捕剿方能得
力

同日福建按察使李永琪奏言八月初五日由鹿
耳門到臺灣府城查軍需一切先經督臣李侍堯
委員源源運送盡屬充裕所有糧餉藥鉛等項除
臺灣府道支放外現在存貯餉銀二十一萬兩有

零兵米六萬一千餘石火藥八萬九千餘斤鎗子
六萬一千餘斤砲子一千八百餘顆火繩一十二
萬三千四百餘盤均足敷應用臣到後連次赴城
外營盤見將軍常青精神照舊強健叅贊恒瑞同
在一處城外營盤甚為整齊嚴肅城內民居安貼
舖戶貿易如常臣現與臺灣道永福同文武各官
督率義勇兵民日則慎密稽查夜則嚴謹巡邏與
城外官兵相為聲應凡存貯軍火處所撥兵防守

仍不時親往查看以免疎虞至鹿仔港軍營應需
一切糧餉藥鉛臣前經過廈門時查閱局內檔案
所有歷次委員撥運過銀米鉛藥并火繩砲子等
項甚屬寬裕茲又添兵五千亦足敷用臣一面飛
查支存各數以備考核仍一面飛移內地總局再
行撥運務使充足有餘不敢稍有缺誤均奏入報

聞

初八日

壬申

上命軍機大臣傳諭福康安常青李侍堯曰附近府城南潭一帶屯佔賊匪前據常青等奏經官兵將賊人蓬蔽草屋悉行燒燬竹箐隨路砍伐賊目莊大田已有潛逃之信常青等即應乘勢搜剿痛加殲戮方得機要乃即行撤兵轉與賊人以暇以致現在該處尚有賊匪糾聚窺伺不能徑趨北路今常青既因府城存貯糧餉火藥及難民甚多恐官兵往北賊又乘間窺伺難免後顧之虞意欲先清南路賊匪就目前情

形而論亦祇可如此辦理常青此時竟當胸有定見
留恒瑞駐守府城親自速領官兵先將南潭一帶賊
匪奮力殲除所有賊寮竹箐悉行焚毀擒挈賊目莊
大田即趨勢恢復鳳山縣城俾府城以南道路肅清
計彼時福康安已由鹿仔港前抵諸羅破賊解圍與
柴大紀會合矣且川黔兩省之兵自己早到該處軍
威更為壯盛常青將南路廓清即徑赴諸羅會同直
搗賊巢以成破竹之勢務須倍加奮勉為要至福康

安已屢經有旨令其速赴鹿仔港決策制勝况藍元
枚平日在彼督率調度雖有條理究不敵福康安海
蘭察二人之智勇兼濟且藍元枚所轄將弁等亦遠
不如舒亮普爾普等之久經行陣奮勇可恃加以巴
圖魯侍衛章京等百餘人驍勇趨捷俱可一以當千
福康安統領如許勇將勁兵又當賊匪猜疑渙散之
勢何堅不推何險不破又何所疑畏稍有瞻前顧後
之見耶且朕前派福康安等前往督辦時初不料藍

元枚猝有疾病不能辦理軍務之事而藍元枚今忽
因染病遂至不起設非早派福康安等前往則鹿仔
港一路統率竟至無人其勢必至掣肘今甫有藍元
枚身故之信而福康安已即日可抵鹿仔港督率籌
辦又值新調官兵雲集士氣振作壁壘更為一新此
即

上天嘉佑默膺朕衷於端倪未兆之時而有先事預籌之
計朕實感謝

天恩默深慶慰即以此事會而論實屬機宜湊合已有成
功先兆諒此么膺草竊又有何伎倆能久延殘喘負
隅抗拒乎福康安尤當堅持定讞乘機鼓舞以期迅
奏膚功副朕委任

臣等謹按常青藍元枚分駐府城鹿仔港等處一
切調度尚有條理我

皇上先幾決策

特命福康安前往督辦並

令統率大兵徑抵鹿仔港而其時藍元枚適以病卒於
軍賴福康安剋期到彼預定鹿仔港進兵之計是
以徵師迅集壁壘一新遂克速奏膚功悉如

睿算此皆

欽承奉若之意有以上格

天心而凡所為察地之宜用人之道亦莫不與

天心相契合也夫

初九日癸酉常青恒瑞同奏言現已派令總兵梁朝

桂副將丁朝雄叅將宋鼎曹貴遊擊左淵等再留
兵二千名同道府共守郡城營盤適八月初七日
添調粵省綠營兵一千名已到軍營臣等即將派
守府城內外各弁兵交梁朝桂等妥協防護一面
將因雨冲壞城柵修固一面將關帝廳各營盤收
小即於八月十六日統領侍衛章京鎮將等帶兵
五千名起程由旱路三坎店木柵灣裡溪一帶赴
北一至鐵線橋將附近鹽水港等處匪衆殲除即

知會柴大紀內外夾擊直達諸羅此時藍元枚亦必前來會合以大兵全力往攻賊巢再臬司李永祺已於八月初五日到臺灣府城臣等現赴諸羅一切軍需要務更可倚恃又查附近民莊前已漸有歸莊耕種者而沿海小港汊亦有可通糧食之處是以郡城糧價不致昂貴至附從賊匪民人臣等已出示曉諭現復刊刻謄黃於各路通行曉諭使賊中附賊之衆咸知悔罪現又招募民人入伍

已得六百餘名分派能事將弁帶領打仗仍留心
察看至山猪毛義民實與他處義民不同據該義
民副理劉繩祖周敦紀曾秀等二十餘人連名呈
稱粵民等祖父自康熙六十年雍正十年逆匪朱
一貴吳福生等先後倡亂屢從征剿皆邀議敘職
銜因號為懷忠里又建立義亭嘉獎匾額今賊首
林典文莊大田等南北肆擾上年十二月間鳳山
初陷粵民未及防備被賊燒燬沿邊各莊粵民等

因遵康熙雍正年間各義民祖父設堆堵禦之例
推舉人曾中立為總理分設六堆統計義民八千
餘人屢經打仗殺賊今聞大兵齊集懷忠各里公
議排出一千三百餘人俱各安頓家室情愿隨營
征剿立功今將軍叅贊傳

旨護送粵民等仍回本處自為守禦粵民等無不深感
流涕但現在義民在家公議時誓願殺賊若非倚
仗官軍聲勢恐難以伸其公憤至其家室中公

同照料即本處各莊防禦事宜人衆心齊賊匪已不敢輕犯仍懇准令隨征等語_臣等察其實係真情合無懇仍准伊等隨營報効立功至_臣等現赴北路到處皆有義民投到惟當令其各在本庄防守於官兵剿賊之時共助聲勢再查現派赴應援諸羅之副將蔡攀龍貴林等因風雨阻滯尚未得有到彼信息數日內諸羅亦無文報_臣等先經諭令駐劄鹽水港之遊擊楊起麟務須設法將火藥

送往諸羅茲據該遊擊稟稱已密差兵丁押同番
民間道零星運送是諸羅鉛藥尚可接濟至添調
浙粵滿洲官兵已到廈門配渡約計數日內俱先
後可到臺灣茲查郡城外營盤雖已收小仍宜嚴
密滿洲兵到時擬留永慶帶廣東滿兵五百名浙
江滿兵五百名駐劄關帝廳營盤臣等劄知梁朝
柱令其面交永慶俾敷守禦再臺灣府知府楊廷
樺自抵臺灣任事一切堵禦巡防經理糧餉屢次

得力茲於八月初六日病故會商督臣李侍堯即以臺灣府海防同知楊廷理暫行署理

同日普吉保奏言藍元枚沾患痢疾一面移咨督臣李侍堯併飛稟將軍臣常青指示機宜速撥大員迅來鹿仔港會同辦理臣仍回馬鳴山軍營嗣據行營中軍叅將福蘭泰稟稱藍元枚病故伏查添派漳州粵東之兵漳州兵已到一千三百餘名粵東兵僅到四百六十名鹿仔港一帶軍營統理

乏員誠恐逆匪乘虛來擾關係匪輕臣不得不先
事預防故仍駐馬鳴山軍營以為鹿仔港捍衛其
沿海一帶口岸嚴飭各員弁留心堵禦稽查以候
常青派撥大員并添調之兵到日會合攻剿均奏
入

上命軍機大臣傳諭福康安常青海蘭察李侍堯曰山
猪毛粵東義民間知賊匪滋擾公議挑出一千三百
餘人俱各安頓家室隨同官軍打仗殺賊隨營報効

實屬義勇可嘉自應優加撫獎令其殺賊立功所有
總理此事之舉人曾中立著常青等查明如係文舉
人即酌量賞給文官若係武舉人即賞給武弁如果
人才可用即予以實缺亦無不可此外義民中尚有
充當頭目隊長者亦著查明量給頂戴以示獎勵俾
伊等倍知感奮踴躍從事以廣招徠又諸羅被賊圍
擾前據柴大紀咨報常青城大火藥漸形短缺今該
遊擊已將火藥密差兵民從間道運送諸羅正可以

資接濟想柴大紀自能保護無虞畧為慰藉福原安
海蘭察等此時自己前抵蚶江即應遵照屢降諭旨
配渡速赴鹿仔港與柴大紀會合進剿而常青廓清
南路亦即可由南往北剿殺沿途賊匪前抵諸羅福
康安等務須倍加勉力鼓勇直前以期捷音速奏又
普吉保駐守鹿仔港並未寸進及藍元枚患病已將
官兵交伊管束伊並未將該處情形如何料理處專
摺具奏至藍元枚病故普吉保正應激勵將弁督率

兵民悉心籌辦奮力自効即自欲見長亦所當然乃
轉移咨常青等派撥大員前赴鹿仔港試思普吉保
身係總兵豈非大員於剿捕賊匪寧非伊分內之事
即使提督印信不敢擅用亦豈得旁觀坐視一籌莫
展伊在彼所司何事著福康安將此情節一併向普
吉保面加詰詢令其明白登答據實覆奏看來普吉
保竟沒志氣將來在彼忍屬無益即總兵亦不能勝
任徒令坐享俸廉不足示儆俟事竣後福康安即飭

伊回京候旨令其前往新疆換班以贖前愆

臣等謹案逆匪滋事之初臺灣義民率多隨同官兵剿賊而山猪毛粵民自其祖父以來急公嚮義屢從征剿今林英文莊大田南北兩路肆擾蹂躪村莊粵民等公議設堆堵禦咸願隨營自効我皇上體恤備至

諭令各歸本處防守而粵民等先已安戢室家普願殺賊立功合詞籲請益以見

國家恩德涵濡至深且厚故小民忠愛激發出於至誠有不待官為驅策而自踴躍從行爭先恐後者逮乎剿捕事竣義民等叨荷

渥恩或賚以職級或表厥宅里褒功之典獎義之方蓋自古未有也

上又諭內閣曰藍元枚業經加恩以示軫恤所有應襲輕車都尉雲騎尉世職著伊長子藍誠即行承襲仍俟百日服滿該督咨送到部帶領引見用昭優卹勤

勞有加無已至意

上又諭內閣曰楊廷樺自抵臺灣任事後於一切堵禦
巡防及經理糧餉等事均屬奮勉出力楊廷樺著給
還布政使原銜以示優卹楊廷理隨營剿捕甚屬奮
勉前已降旨賞戴花翎所有臺灣府知府員缺即著
楊廷理補授

初十日
戊甲

上命軍機大臣傳諭留京王大臣刑部堂官曰藍元枚

病勢沈重之時猶知以軍務為重黃仕簡身為公爵受朕厚恩較之藍元枚更為優渥且伊在提督任亦較藍元枚更久伊從前株守郡城一籌莫展即據稱實係患病亦應即奏明將軍務另派人料理如藍元枚據實陳奏自請罷斥効力方為稍有人心乃何以計不出此一味因循惟怯藉病支飾辜負朕恩其罪實無可解免著將藍元枚前後奏到之摺抄寄留京辦事王大臣會同刑部堂官即監提黃仕簡將此旨

並二摺給與閱看並嚴加詰訊令其明白登答據實
具奏

十一日^{乙亥}常青恒瑞同奏言八月十八日探有賊

人聚集府城北門外十里之三坎店一帶焚劫^臣

等於十九日卯刻親率侍衛章京鎮將協領等各

帶弁兵前抵離營十里之大灣塘劉住隊伍當派

烏什哈達岱森寶果爾敏色希明陸廷柱謝廷選

楊廷理等帶兵二千五百名城內義民一千廣東

義民一千於辰刻到三坎店有賊三四千人對放鎗砲移時不退因該處溪水漲後週圍泥濘是以賊人恃險但泥水只深一二尺烏什哈達岱森寶希明等帶領官兵過河鎗砲並施賊人敗逃計鎗砲弓箭共斃賊二百餘人奪獲虎尾砲一尊賊械二十餘人燒燬賊寮二百餘間地瓜乾六十餘担米二十餘担分賞義民傷亡兵民照例賞卹_臣等帶兵五百名正在大灣塘接應令鎮將等分路追

剿旋據梁朝桂官福差報南潭中洲一帶有賊三
四千攻犯營盤并分攻桶盤棧臣等隨帶兵五百
名飛赴營盤迎擊當經梁朝桂等施放鎗砲將賊
打退其小南門之桶盤棧有副將丁朝雄叅將宋
鼎并司道李永祺永福共率兵民排齊鎗砲賊即
不敢前進退入竹箐時已未刻地盡汙泥收兵回
營至派赴應援諸羅之叅將孫全謀係初五日已
到新店現擬與駐劄鹿仔草之遊擊邱能成商同

將先到兵八百名前往鹽水港與遊擊楊起麟會
救諸羅而副將貴林蔡攀龍都司杭富俱未見到
茲於十九日接據叅贊柴大紀三十五等曰小
字文報內稱賊匪四處搭寮逼近縣城外庄現在
激勵兵民竭力固守又稱暫撤鹿仔草鹽水港之
兵以救縣城俟縣城圍解再行打通道路分兵駐
守等語是諸羅賊勢仍未少減查副將貴林蔡攀
龍等雖阻風雨今閱兩旬計此時亦必齊到又有

楊起麟邱能成合兵向前定可直透諸羅痛殲賊
衆至遠近民人多有呈請歸庄者當即散給腰牌
令其各安本業並有連庄具呈俟大兵一到情愿
齊心捕賊者其沿海安平等處投充入營者頗多
已據守備林登雲募得年壯新兵一千餘名又郡
城義民首亦時有呈送入伍并有欲求投誠之人
雖少費稽查防範然從此離間解散自有得力之
處再現在江寧將軍永慶廣東副都統博清額於

二十一日已到軍營帶到滿兵四百餘名其在後
滿兵二千餘名亦計日即到臣等悉心籌酌臣恒
瑞即親帶侍衛章京岱森寶富克精額副將謝廷
選遊擊林起鳳劉越等共統領滿漢官兵三千名
於八月二十二日起程赴援諸羅仍由海道前赴
鹽水港鹿仔草相機前進若副將貴林蔡攀龍叅
將孫全謀等所帶兵丁一千六百名已同駐鹽水
港遊擊楊起麟駐鹿仔草遊擊邱能成等將圍困

諸羅之賊殺散臣恒瑞即將沿途賊踞之庄悉力
剿除使道路通順前抵諸羅與柴大紀面商或派
官兵守鹽水港鹿仔草或調新到之兵夾攻斗六
門均俟臨時酌定臣常青仍帶現有之兵五千餘
名搜剿南潭中洲大穆降一帶賊巢奏入

上命軍機大臣傳諭福康安常青恒瑞李侍堯孫士毅
曰本日常青等奏到各摺係八月二十二日拜發因
船隻被風打至廣東潮州經孫士毅另由江西一路

加緊馳遞奏到頗為迅速所辦甚好朕盼望軍報曰
深厓切此次常青奏摺若因風打至潮州後仍令由
閩省發遞則往返稽延轉多時日今孫士毅即由江
西一路迅速奏到實屬曉事可嘉著賞給大小荷包
鹿內以示獎勵仍著該督得有臺灣剿賊信息隨時
速奏至常青等久駐府城營盤未得寸進其因循觀
望實應自知慚愧今恒瑞既親帶官兵前往自應由
陸路遇有賊匪即痛加剿殺速抵諸羅今轉由海道

行走竟是避賊且道里紆迴未免又致遲緩著常青等即將何以不由陸路往援之處據實具奏又所稱接據柴大紀咨稱欲暫撤鹿仔草鹽水港之兵以救諸羅俟諸羅圍解再行分兵駐守等語鹿仔草鹽水港二處係府城前往諸羅要路現尚有賊匪滋擾自應留兵駐守未可輕撤若此時該二處尚未撤兵即不必輕易撤動倘柴大紀因縣城圍急已經調往則恒瑞於帶兵往援時即應分派將弁酌留兵丁在彼

加意駐守為是邱能成楊起麟屢經帶兵殺賊甚屬奮勉邱能成已由守備超擢其遊擊楊起麟著交福康安查明如遇有叅將缺出即奏明陞補以示鼓勵至藍元枚所遺水師提督員缺朕意欲即令柴大紀調補今因鹿仔港一路乏人經理是以先令蔡攀龍署理又恐蔡攀龍未能即抵鹿仔港續經降旨令李化龍暫行署理至陸路提督一缺朕意蔡攀龍屢次帶兵剿賊且為賊匪所畏最為出力將來自可擢用

但伊甫由遊擊超擢副將又陞總兵為時不過幾月
若遽任提督未免稍驟並著福康安留心察者如果
蔡攀龍實能打通諸羅道路接應柴大紀打仗奮勉
著有勞績即奏明將伊陞擢否則於軍前總兵內擇
其實在奮勇出力者保奏一員補授以示獎勵常青
等所奏在三坎店與賊打仗廣東義民隨同官兵殺
賊頗為出力其陣亡者皆當查明賜卹而隨軍之義
民亦應給予口糧又據常青奏該處溪水漲發道路

泥濘雖係臺灣地方非北方可比但此時已屆深秋
天氣日漸高爽雨水亦已稀少正應迅速進兵擒渠
掃穴不可藉詞稍有遷延致失事機此為最要又本
日據鑲藍旗都統奏接准李侍堯等咨文將該旗被
賊戕害之原任同知長庚家產查封一摺此事李侍
堯等所辦殊屬漫無區別著傳旨申飭前因孫景燧
在臺灣府任內將庫貯銀兩侵虧至十餘萬之多該
員貪黷斂怨釀成事端又復任意虧缺其罪甚重不

得以其身故即置不問是以降旨將伊家產查抄以備抵項至此外被賊戕害各員究屬因公被害如在任內並無別項劣蹟尚應仍與恩卹用昭激勸至長庚止係同知自不應有經營庫項今已被賊害若又將伊家產查封則該員等既不能仰邀卹典轉致家產抄沒豈為事理之平除已另降諭旨令該旗將長庚家產即行給還外其任所貲財著李侍堯毋庸查辦此外被害各員並著李侍堯一體查明如伊等任

內實有侵貪款蹟者自應奏明將伊家產查抵若並
無別項劣蹟者俱著無庸咨查辦理

臣等謹按臺灣奸民糾衆滋事皆由地方文武貪
黷歛怨釀成事端其虧缺庫項自應籍其家賞以
抵官帑至被賊戕害各員在任時或貪聲素著或
劣蹟無聞所當核其平昔彰善癉惡以示大公我
皇上權衡至當於貪劣之員即

飭令查抄而平日居官尚無過失臨事猝遭慘害者既

免其抄產復

特加恩卹煌煌

聖訓所以做貪吏而卹死事者仁之至義之盡矣

十二日
子丙

上命軍機大臣傳諭福康安曰昨據常青等奏柴大紀
咨稱賊匪四處搭寮逼近縣城欲暫撤鹿仔草蘆水
港之兵以救縣城俟縣城圍解再行打通道路分兵
駐守等語朕披覽之下即覺其辦理紕繆已降旨訓

諭今復輾轉思維此事大有關係柴大紀乃有籌奠
之人伊豈不知從前魏大斌前往諸羅時將軍裝火
藥留於鹿仔草交邱能成等看守若官兵一移賊匪
必致搶劫乃為此撤調之言明係因諸羅圍困常青
等總不肯發大兵往救故為此言以激動常青等之
意而常青無所可否僅以一奏塞責實為負朕委任
若常青等稍有見識自當將鹿仔草現存軍裝火藥
甚為緊要若將官兵撤動轉被賊人搶去更屬不成

事體之語飛檄柴大紀令其不可輕撤一面即自統
兵由府城至諸羅陸路速往救援仍遵前旨留恒瑞
駐守府城方合機要乃竟計不出此常青不往北而
往南恒瑞不由陸而由海繞道避賊竟置鹿仔草蘆
水港於不問且前此蔡攀龍等數次接應皆由海道
繞往已為非是恒瑞親統三千大兵何向不克正可
將沿路賊匪痛加殲戮縱使少遲一二日再到諸羅
方無後顧之虞而乃又踴惟怯故輒繞海而行斷不

能將鹿仔草軍裝火藥帶往是諸羅又添三千吃飯
之人豈不又成笑話且摺內又不將是否撤調軍裝
火藥有無妨碍及因何由海道繞往不由陸路剷除
之處詳晰奏聞看來伊二人於軍旅之事全然不能
措置即留於臺灣亦屬無用著福康安將此旨向常
青恒瑞面加訊詰據實具奏現在海蘭察等及各鎮
將多人不乏領兵之員福康安當察看情形若南路
實帶兵乏人不妨仍留伊二人在彼令其立功贖罪

若實在不能得力留彼亦屬無益即一面據實具奏
一面令其回京候旨但常青等昨日奏到之摺係上
月二十二日所發計接到此旨又須二十餘日是來
往已在四旬之外誠恐緩不濟急朕既思及此處知
常青等辦理失策不得明切指示著福康安於抵
諸羅後將鹽水港鹿仔草之兵曾否撤動前遊擊楊
起麟邱能成具報將火藥由間道陸續運送是否完
竣之處嚴行查詢據實具奏

同日福康安奏言臣因南路賊匪既未剷除諸羅被困危急常青等株守郡城尺寸不能前進調度失宜兵氣餒弱似應徵調得力新兵前往進剿臣原擬先行速渡臺灣激勵將弁相機辦理若於此項兵丁未到之先已經摧破賊巢即可飛咨停止設或尚稽時日彼時再行徵調更恐緩不濟急且賊黨多藉隸漳泉內地消息頗通見官兵添調甚多先聲所至必聞風膽落是以專摺直陳今蒙

訓示始知前奏冒昧連日啟看南來軍報常青恒瑞奏
於十六日前往諸羅留兵二千交梁朝桂看守府
城揚言十三日起程而賊匪即於是日各要路四
出攔截仍復收軍不能前進等語竊思南路賊匪
尚在屯聚該將軍等自當一人留駐郡城廓清南
路一人帶兵直抵諸羅方為妥協乃常青恒瑞一
同前往毫無措置且起身日期定於十六日倡言
於外正應移後數日使賊人猝不及防乃聲稱十

三日起程轉令賊匪預先準備以致梗阻道路而柴大紀被困諸羅雖能盡力捍禦但環營刨挖溝濠係札營後即應辦理之事何至受困日久始令武舉黃奠邦等畫辦及此看來常青恒瑞柴大紀於行軍之事措置均屬乖方茫無頭緒即此數端已可概見藍元枚駐守鹿仔港又已患病身故此時南北兩路官兵僅能株守支持斷難望其振作臣惟有趕赴廈門相度情形速往臺灣另行申明

軍紀立使該處弁兵氣象改觀一洗從前萎靡之
習並與海蘭察等通盤布置整頓兵力先操必勝
之勢務期初次接仗即將賊匪痛加剿殺一面追
捕一面出示剴切曉諭妥為安撫解散賊黨想賊
首賊黨自不難即就殲擒再查屯練兵丁赴閩路
程據巡撫琅玕按察使歸景照僉稱自江西至浙
江常山縣徑達閩省較之由江南行走程途計近
一千三百餘里等語臣已咨明經過各省先行預

備并行知帶領總兵穆克登阿一體遵照奏入

上命軍機大臣傳諭福康安李侍堯曰福康安正當堅
持定見鼓勇直前奮力進剿乃摺內尚稱現在蕪程
馳赴廈門察看情形如鹿仔港有機可乘即由蚶江
配渡等語是不免尚有猶豫之見此時必應遵照節
次所降諭旨決計迅赴鹿仔港統領官兵安定人心
振作士氣直搗大里杙賊巢方合機宜此乃一定不
易之理豈可尚有游移林爽文以愚賤編氓乃敢糾

衆倡亂劫縣戕官荼毒百姓豈有

上蒼不默鑒朕衷仁愛斯民而轉令此等逆匪肆逆滋擾
久延殘喘之理且黨羽不過漳州一處之人較之粵
東泉州義勇百姓僅止三分之一即以臺灣之人攻
臺灣之賊已屬事半功倍況加以如許官兵更復何
往不克又况陸續添調之兵源源接應耶且林與文
所有糧食火藥等項止係在臺灣各處搶掠隨用隨
盡豈能久支而官兵糧餉軍械鉛彈火藥絡繹運送

用之不竭是賊人之力量有盡而官軍之接濟無窮
賊匪又何能負固一隅相持日久乎此福康安尤可
恃以無恐者福康安既以朕心宵旰靡寧為念倍當
決機鼓勇迅速籌辦以慰朕懷福康安之志定則朕
之心亦安不可不善體朕意勉圖奏績看來目下情
形臺灣郡城及柴大紀處轉可無慮而朕之所最懸
念者實在鹿仔港一路藍元枚係漳州人今甫經病
故該處領兵乏人賊匪自必聞知心生窺伺設使鹿

仔港稍有疎虞則諸羅之勢更孤倍難守禦所關甚重福康安竟當直由蚶江速赴鹿仔港激勵官兵鼓勇直前為是

同日何裕城奏言四川屯練降番兵二千名赴閩進剿必須行程倍加迅速今據浙江巡撫琅玕以川兵原定於江南浙江行走若改由江西之九江府等處從常玉山入浙省之衢州府達閩計程較近一千餘里臣預備催趲前進等因臣查琅玕

擬改之路程固可減省行程但川兵自江西之九江府入境經過南康南昌饒州等府抵廣信府之河口鎮係江西入浙入閩分路之處若如琅玕所擬從河口鎮起身度常玉山經由浙江之衢州再度仙霞嶺抵閩省之建寧府計程九百九十五里如不經由浙江即從河口鎮起旱由鉛山縣過嶺徑入閩省之崇安縣達建寧府前進計程四百三十里較琅玕所擬路程尚可少行五百六十餘里

兼可少過一嶺更為便捷臣不敢拘泥浙省所擬
路程繞道稽緩除行司在於河口鎮至崇安縣一
路及水陸經過各屬預備船隻夫馬口糧等項以
資應付屆期飭令藩司李承艱赴河口鎮督率經
理臬司額勒春在省城上船處督率照料并知會
南昌鎮臣永安帶同官兵沿途彈壓臣一俟入境
有信馳赴九江府首站於官兵起早處所躬親督
率料理奏入

上命軍機大臣傳諭何裕城曰此次屯練各兵行期緊急若早到臺灣一日即可得一日之用今由鉛山旱道入閩路程既較琅玕所擬之路為近自應即改從此路行走以免稽遲何裕城能不拘泥浙省來咨通融籌辦俾軍行倍得迅速甚屬可嘉著賞給大小荷包以示獎勵仍著飭令所屬於川兵入境後妥為照料迅速前進

欽定平定臺灣紀畧卷三十六

欽定四庫全書

欽定平定臺灣紀畧卷三十七

九月十四日戊寅李侍堯奏言諸羅被圍日久前接

將軍常青來札知又遣副將貴林蔡攀龍叅將孫

全謀等帶兵一千六百名前往應援嗣於二十四

五等日接臺灣各官稟報因八月以來暴風頻作

各兵由水路沿海往鹽水港去而復回兼有失風

耗損者八月十四日尚未到齊柴大紀等在諸羅

尚在固守惟糧食已無甚為竭蹶劉鹽水港之遊擊
楊起麟先催番民四人各帶火藥二十五觔番銀
四五十圓晚間伏地而進後又催十一人如前運
送俱得到諸羅擬再多雇暗運接濟十五日以後
風勢稍息貴林蔡攀龍等料可俱抵鹽水港該道
永福又令鹽水港隨營之縣丞徐英等多催義民
數千協力前進諒必打通道路二十九日有舡到
廈詢知蔡攀龍等已於二十前後到鹽水港查該

處及鹿仔草本有府城遣往運送糧餉之夫役五
六千名今該道又在鹽水港僱義民數千協同前
進是兵力亦已厚集且鹽水港鹿仔草亦俱有兵
駐劄蔡攀龍等見前此魏大斌等輕進被截自必
步步為營接續前進不至為賊所誘定可打通道
路奏入

上命軍機大臣傳諭福康安李侍堯曰諸羅雖被賊圍
糧餉火藥不無短缺經揚起麟催畚民運送接濟實

為出力可嘉楊起麟前已降旨遇叅將缺出即令補用矣至賊人夥黨雖衆止係一時迫脅現據李侍堯奏臺灣道永福已令益水港隨營之縣丞徐英等雇覓義民數千人協力勦賊可見該處百姓皆知賊匪立就殄滅無不急公投効若大兵一到或剿或撫賊黨自必紛紛解散日就窮蹙諒此等被脅民人豈有不願為良善子民而轉肯為賊出力之理且藍元枚未經患病之先朕早已令福康安前赴臺灣督辦軍務

機宜奏合實為成功先兆福康安尤當深信不疑恃以無恐至將來柴大紀調補水師提督後所有陸路提督一缺朕因蔡攀龍由遊擊甫擢副將即陞總兵不過數月若即用為提督未免稍驟今思該處帶兵總兵如李化龍等俱不若蔡攀龍之奮勇而蔡攀龍係本省人在閩最久該處情形較為熟諳自不若即以蔡攀龍補用陸路提督更為得力著福康安李侍堯留心察看如蔡攀龍果能奮力破賊即先將蔡攀

龍傳旨補授以示鼓勵再徐鼎士前此約會藍元枚
由大肚溪進兵伊由大甲溪進兵夾攻大里杙賊巢
本為佳策藍元枚未即前往即已身故現在該處究
竟作何籌辦接應徐鼎士是否尚在淡水抑已與李
化龍等會同進兵大甲溪總未據續有奏報並著福
康安李侍堯各將徐鼎士一路近日攻剿情形迅速
覆奏

同日常青奏言山猪毛義民臣前次未將該處設

堆堵禦共有義民八千除保守本庄外又挑出一千餘人俱各安頓家室公議各緣由詳晰聲叙實屬錯謬茲擬於剿捕南路即順便令伊等各回本庄又副將貴林蔡攀龍叅將孫全謀等帶領官兵一千六百名已於十九日自鹽水港起行前往諸羅現在未接柴大紀等文報但叅贊恒瑞又帶滿漢大兵三千名于二十二日起行聲勢更甚諸羅定可無虞道路自必通暢至浙省滿兵俱已到齊

亦已陸續前來臣惟有乘新兵銳氣速擒南路賊首莊大田即趨赴北路會攻賊首林爽文大里杙賊巢必不敢因循貽悞自干重咎奏入

上命軍機大臣傳諭福康安常青李侍堯曰常青仍令山猪毛廣東義民各回本庄所辦又屬拘泥既自知前此聲叙未明係屬錯謬而於奉到續降諭旨之後又欲將該義民等送回本庄何不曉事體若此該庄人衆心齊既自能防禦而挑出隨營之一千餘人又

能激發義憤願隨官兵助剿常青正當聽從所請令其隨同殺賊立功正可以助官軍聲勢今復行拘泥遣回豈不阻伊等急公投効之心着常青於接奉此旨即派瑚圖里前往該庄傳旨嘉獎並諭以此事係屬常青辦錯現已有旨申飭該義民等仍當前赴軍營隨同官軍征剿如能殺賊立功即當邀恩得賞官職俾該義民等益加踴躍從事更可得力所有義民副理劉繩祖並即着一體賞給官職以示獎勵現在接

應柴大紀之蔡攀龍等據常青奏已於八月十九日自鹽水港起行自己即日前抵諸羅恒瑞又帶兵續往是該處軍勢壯盛不但諸羅之圍已解而鹽水港鹿仔草一帶亦無可虞今常青棄官兵新到銳氣親自統領先將南路屯佔賊匪剿殺無遺擒拿莊大田此亦先清後路一策常青務須奮力搜剿以清肘腋現在蔡攀龍已由鹽水港前抵諸羅若恒瑞彼時由陸路前往正可將鹿仔草沿途一帶賊匪迎頭截殺

打通道路會合柴大紀乃轉由海道行走豈不紆迴
遲緩此時恒瑞自己由鹽水港前進而柴大紀處已
得蔡攀龍接應之兵若與恒瑞合力攻擊先將鹽水
港以南府城以北一帶賊匪痛加殲戮廓清道路俾
中間毫無梗阻固屬甚善否則或竟合兵一處徑搗
大里杙賊巢擒拏首惡亦可期迅速集事其如何定
計前往攻剿之處著即速行馳奏鹿仔港一路藍元
枚於上月十八日病故後無大員統領恐賊匪生心

窺伺殊深懸切但鹿仔港果有賊滋擾李侍堯自必業已奏到今並未據該督奏及是鹿仔港諒亦無虞福康安即當直抵諸羅速奏擒渠掃穴之績

同日舒常姜晟同奏言川省運閩米二十萬石分裝舡六十二隻於七月十九日自重慶開幫八月二十八九等日陸續到漢臣等派糧道連桂帶同漢陽府縣并委雜職等官照料川省委員等盤量過載計楚舡五十七隻足敷裝載於九月初四日

自漢口陸續開行臣等仍派委巡檢把總四員協同護送出境其二運米舡抵漢者現已過半亦將取次過載三四運米舡據原任荆宜施道陳大文及宜昌府縣等稟報已均入楚境啣尾遄行當亦隨後抵漢換舡過載不至遲逾至楚北運閩米十萬石亦分四運自八月初十日頭運米舡開行每間五六日後啓行今頭批米舡已於九月初一日齊抵德化縣轉送前進二批亦到過半均應於吳

城鎮換舡過載業經江西撫臣委員照料臣等亦

仍嚴飭押運各員催償前行務於江西本省米石

運竣趕緊接運不至守候耽延再川省自宜昌府

巴東縣入楚境至黃州府黃梅縣出境計程二千

二百里應設水臺一十九處臣等遴派正印官分

赴各府屬沿江地方每隔一百二三十里不等可

以灣泊舡隻之處搭棚安站一面預備牛羊米麵

油茶等項以便臨期贍給其入境後宜昌荊州一

路業已派有府道會同宜昌鎮率帶文武員弁分段照料彈壓一俟抵漢換舡臣等即親至漢陽督同妥為辦理並於例得供支之外量加賞賚務令屯練等踴躍歡欣邁行無滯仍飭藩司陳淮前往黃梅縣照料出境再本月初二日接准協辦大學士福康安咨開四川屯練兵丁自九江由江西玉山常山徑至衢州較近一千餘里自應改從此路以期速達閩省當即飛咨江西撫臣何裕城查照

迅速妥備至漢口為各省商販聚集之所如雇備
舡隻之事辦理不善恐有妨於商民舡戶或致各
貨阻滯長價不可不通盤籌議前經出示曉諭所
有不合用舡隻毋許封雇今雇備轆轤應運之舡
計足敷用除守空給與飯食開行照例給價外復
將舡數已數毋庸封雇緣由出示張貼今商民人
等販貨往來一概聽便并嚴查胥役人等留難阻
滯是以漢口地方需用舡隻為數雖甚繁多而商

民艤戶等均極寧貼如常

同日孫永清奏言黔兵如須調遣應由黔省古州
丙妹一帶入粵西之懷遠縣出蒼梧縣入廣東之
封川縣境計程雖一千八百餘里俱係水路順流
直下最為便捷所有各兵沿途支應口糧鹽菜等
項均經密飭經過各地方官一律准備並派委右
江道陸蒼霖馳赴黔粵交界之梅寨地方督同該
府縣彈壓照料柳州一帶派委護鹽法道李鏡圖

督送潯州府一帶派委左江道楊雄業督送一俟
接有黔兵起程之信即分飭馳赴各站董率妥辦
臣仍前赴梧州府親行點送出境至需用舡隻現
值粵西官兵趕緊啓行即黔兵接續過境舡隻亦
儘可敷用又於八月二十五日接准督臣孫士毅
咨稱現准將軍常青咨會奏請添調粵西官兵三
千名赴臺灣協剿若恭候

硃批未免緩不濟急自應飭令即日起程等因當即飛

咨提臣令飭原派各營將弁立即帶兵自營起程
扣算路途遠近勒限均到梧州彙齊分起啓行并
委護鹽道李鏡圖馳赴平樂左江道湯雄業前往
分頭督催照料其柳州府一帶即令右江道陸蒼
霖就近督催務期迅速趨行俾早行一日則軍營
早收一日之效至粵西各標協營現存預儲三年
火藥共二十七萬有零為數頗多臣現在札商提
臣三德再添撥二萬斤共成五萬並配就鎗子鉛

彈於官兵行走之後委員解赴潮州聽候督臣轉
解赴閩備用均奏入報

聞

十五日祀

上命軍機大臣傳諭福康安李侍堯曰魏大斌到諸羅
後已越月餘而鹿仔草被截糧餉火藥尚未能運送
到縣魏大斌自應親帶官兵出城將諸羅至鹿仔草
一帶賊匪奮力往來剽殺開通道路接應糧餉火藥

方可稍贖前愆乃惟知株守城中安然坐食專待他人救援伊竟袖手旁觀一籌莫展試思魏大斌前往諸羅係為何事且伊係總兵非若偏裨將弁必聽柴大紀調度派委者可比似此一味株守又安用該總兵前往援應耶福康安到諸羅後切寔查明將該鎮恒怯貽悞之處即行據實叅奏至魏大斌所帶官兵損失至一千一百名之多此項兵丁未必皆係陣亡恐其中臨陣脫逃甚至有潰散從賊者不可不查明

嚴辦又前此鳳山潰散兵丁未經投出者甚多俱著
福康安於事定後詳細查察並著李侍堯飭屬於內
地沿海一帶嚴密查拏如有潰散逃回及從賊者即
應訊明分別按律嚴辦勿致倖逃法網

十六日辰唐琅玕奏言四川屯練兵丁從川江順流

而下由湖北先至江西必由九江府行走該處有
兩路俱係由浙入閩通行大道一自九江府由安
徽江南浙江至衢州府計水程二千三百餘里自

衢州西安至閩省浦城縣旱路二百四十餘里一
自九江府湖口縣至玉山水程九百餘里自玉山
經浙江常山至閩省浦城縣旱路四百二十餘里
川省屯練兵丁改由江西行走較為便捷因將軍
臣福康安到浙面同商酌福康安亦深以為然即
飭沿途地方一體預備查自衢州至閩陸路一切
過兵事宜先俱委令杭嘉湖道清泰會同金衢嚴
道玉德督率各該地方官辦理已有章程惟常山

一路並未經過兵差現仍委令該道清泰前往妥協備辦務使行走迅速不至稍有遲悞再海蘭察等帶領侍衛章京拜唐阿等已於二十二二十五二十九等日出境將軍臣福康安帶領侍衛章京各員於九月初四日入閩省浦城縣界奏入

上命軍機大臣傳諭福康安常青李侍堯曰海蘭察等與福康安先後出浙江境入閩想海蘭察等抵蚶江時自必等候福康安一同配渡齊抵鹿仔港激勵將

士整頓兵力軍威振作壁壘一新即日前抵諸羅合
兵進剿惟是常青一路現在統兵搜剿南潭鳳山一
帶賊匪擒拏賊目莊大田該處帶兵鎮將如蔡攀龍
等已經常青派令援應諸羅恒瑞亦已接續前往其
餘將弁恐無奮勇可恃之人應於所帶巴圖魯侍衛
等酌派一二十人令其前赴南路交常青派委帶兵
擒拏賊目莊大田更為得力但福康安初抵鹿仔港
時該處至府城道路或尚未通順難以派令過往應

於前抵諸羅殺散賊匪與柴大紀會兵一處後再行
派往巴圖魯侍衛等亦可迅速前進不虞梗阻至福
康安抵諸羅後若常青尚未將莊大田拿獲福康安
不可因常青尚未得手轉置大里杙而先赴南路攻
剿舍近就遠使賊首得以負固稽誅此為最要徐鼎
士處前曾諭李侍堯添撥兵一千名徐鼎士又招集
義民熟番數千人正可乘機攻擊福康安亦應於所
帶巴圖魯侍衛內酌派數人前往幫同帶兵合剿更

可期得力至常青自三月初間抵臺灣後在彼已閱
半載較之黃仕簡在彼止有兩月耽延更為日久且
黃仕簡止帶兵二千餘名前渡臺灣而常青渡臺灣
時所帶之兵已有五千餘名今又陸續添調多兵是
兵力較之黃仕簡多至數倍若此時常青能將莊大
田拿獲收復鳳山俾南路肅清即屬常青之福尚可
將功抵罪倘福康安等已將大里杙賊巢攻破首惡
就擒而常青尚未能拿獲莊大田收復鳳山仍須福

康安統兵前往剿捕賊事則常青之罪甚重恐難邀
寬宥至福康安與李侍堯面晤後於何日配渡前抵
鹿仔港及李侍堯得有軍營稟報各情形即行迅速
馳奏

十七日

辛巳

李侍堯奏言初四日接楊廷理稟稱中

秋前後連接柴大紀來文并外間偵探消息知諸

羅尚在固守硝可取土熬煎米亦尚有出處十七

日貴林蔡攀龍等到鹽水港十九日領兵前進二

十日貴林楊起麟邱能成為頭隊蔡攀龍孫全謀
為二隊一路前剿正遇大雨賊又乘勢包圍幸柴
大紀帶兵接應入城兵民尚無大折又探得到諸
羅之兵於二十二日仍復自諸羅打出以通道路
至恒瑞所統兵三千因舡少不能盡載二十二日
即先往一千六百名餘亦連日續進等語查諸羅
被圍已逾兩月茲據楊廷理所稟則是道路已通
即途次尚有賊匪伺間出擾而蔡攀龍等已可往

來剿殺斷不至如魏大斌之再入圍中適恒瑞所帶兵三千名又已續到兵力既可接濟軍勢亦益壯盛數日內恒瑞與柴大紀等自必會同高商先將諸羅城外之賊剿洗即可尅期直攻大里杙再接再據帶兵鎮將等稟稱去冬及本年春夏間調往各官兵所帶帳房經夏秋雨淋風刮已俱破爛難以棲止懇即製給更換等因自係實在情形兼有隨帶火藥等項尤須遮蔽嚴密不至潮濕方可得

用又舊時駐臺班兵本無帳房今亦有隨征者並應給與帳房以免露宿是以臣飭司道會同營員按照軍裝則例先製造一千架分解臺郡及鹿仔港等處以供配給其近日所派一萬一千之滿漢官兵及本省增調向東港鹿仔港鹽水港之進剿各兵甫經派往所帶帳房毋庸添補奏入

上命軍機大臣傳諭福康安常青李侍堯曰福康安等剿捕賊匪除臨陣殲戮不計外其拿獲首逆及有名

大頭目自應解京盡法處治其賊人小頭目及夥匪等若概行解京長途押送未免徒勞駟傳着福康安李侍堯於獲犯後酌量輕重將賊匪助惡大頭目可脩究訊者派員解京若不過隨同夥犯即着在該處審明正法以免煩擾至廈門地方為拏獲臺灣匪犯解送經過要地不可無滿兵彈壓着李侍堯派調閩省駐防滿兵一千名或五百名前往但五百名恐兵少不足以示威重竟應調撥一千名為是朕為軍旅

要務曉夜思維凡所以代為籌畫之處無微不至李侍堯自能仰體朕意遵照妥協辦理也

十八日

壬午

上諭內閣曰福建水師提督員缺着柴大紀調補其陸路提督員缺即著蔡攀龍補授並著授為叅贊至副將貴林等俱屬奮勇可嘉亦應加恩陞擢前此常青派令總兵魏大斌接應諸羅中途遇賊攔阻及抵諸羅後又祇知坐守縣城並未能帶兵出城勦賊實屬

畏憚無能魏大斌着革職交福康安留于軍前効力
贖罪所遺浙江温州鎮總兵員缺即著貴林補授貴
林所遺廣東羅定協副將員缺即著孫全謀補授孫
全謀所遺廣東大鵬營叅將員缺即著楊起麟補授
其游擊卹能成著交福康安遇有叅將缺出即奏請
陞補除蔡攀龍貴林已賞花翎外孫全謀楊起麟卹
能成俱着賞戴花翎用示鼓勵

上又命軍機大臣傳諭福康安常青李侍堯崇大紀蔡

蔡攀龍曰蔡攀龍等帶兵直抵縣城自必乘勢將諸羅以南府城以北沿途屯佔賊匪悉數殲除肅清道路而諸羅迤南附近村庄義民更可安輯柴大紀等自必妥為撫慰整頓軍威以圖進取計此時福康安已應由鹿仔港前抵諸羅自可合兵進剿但柴大紀蔡攀龍於剿散沿途賊匪後自即應定計統兵往北直攻大里杙賊巢以為掃穴擒渠之舉柴大紀蔡攀龍現在彼此相商作何籌畫著即將辦理情形迅速具

奏至楊起麟既與蔡攀龍等同抵諸羅其鹿仔草存貯糧餉火藥等項斷無尚留該處是否官兵運送諸羅縣城又前據柴大紀奏諸羅被賊侵擾時有紳耆舖民挑送飯米涼水分給官兵已有旨令福康安等查明首先倡率之義民頭目酌賞官職至幫同官兵固守諸羅縣城之義民頭目及義民等亦應酌量加恩並著柴大紀查明首先倡率及實在出力者奏明分別酌賞職銜以示獎勵至該處既得有勝仗兼之

道路已通何以尚未見崇大紀奏報蔡攀龍現已擢任提督授為叅贊是伊儘有奏事之責該叅贊在彼如何定計攻剿打仗殺賊之處亦著隨時迅速具奏至楊起麟現已陞補廣東叅將但伊係閩省人在臺灣日久打仗出力于該處情形自為熟悉將來即應留于臺灣更為得力着福康安俟大功告竣後遇有臺灣叅將缺出即行調補以叙駕輕就熟之益

十九日

癸未

普吉保奏言前以鹿仔港統理乏員關

係甚大不得不俟將軍派撥之員來港然後進發
今鎮臣李化龍既經帶兵前來是統理有人臣一
俟伊到即可共為籌度相機進剿第該鎮臣李化
龍初到鹿仔港於地勢賊情難以深悉臣一面將
此地情勢詳悉告知乘此兵力已足應留該鎮在
鹿仔港固守調度臣即親帶官兵前往西螺斗六
門一帶奮力勦賊奏入

上命軍機大臣傳諭福康安李侍堯普吉保曰鹿仔港

一路前因藍元枚病故後深恐賊匪聞知生心窺伺而普吉保於藍元枚將官兵移交該鎮管束後並未將該處情形及如何籌辦進剿之處詳悉具奏是以降旨飭諭今據奏一俟李化龍前抵鹿仔港普吉保即帶兵往西螺斗六門一帶攻勦所奏較合機宜殊覺改觀是鹿仔港現屬安靜無虞賊擾現在福康安已即日前抵鹿仔港又有李化龍在該處駐守普吉保自應乘粵兵新到親督將弁速往西螺斗六門一

帶奮勇攻剽力圖自効至福康安到臺灣正值秋涼
晴爽道路已乾添調之兵陸續到齊亟應趁此機會
以期尅日蕪事

今日李慶棠奏言預備點兵臣即會同提臣保成
飛檄原派各營將脩限文到即日帶兵起程并知
會總統威寧鎮總兵許世亨迅速馳赴古州帶領
分起前進其一切支應各事宜責成署布政使陳
大文署按察使張繼辛督理妥辦所有下遊古州

鎮遠二鎮標并清江協營共兵五百名距廣西較
近作為第一起現委貴東道尼堪富什渾會同古
州鎮總兵馬詔蛟照料催趲出境臣撫標及貴陽都
勻二營共兵五百名作為第二起即于九月初八
日起程上游提標及定廣長寨協營共兵五百名
作為第三起大定平遠黔西遵義四協營共兵五
百名作為第四起現委糧儲道索諾木札木楚會
同營員沿途督催彈壓提臣保成即日可以抵省前

赴交界地方護送出境臣俟上游官兵經過省城
即馳赴古州總匯之地親身督率照料其火藥鉛
彈均係加倍攜帶軍裝俱屬整齊至經過各州縣
應付人夫船隻等項業經預備齊全不致稍有停
滯奏入報

聞

二十二日丙戌何裕城奏言據江西省各縣驛稟報

近有常青等奏摺報匣二起先後遞過俱附有兩

廣督臣孫士毅傳牌內開因係海船被風打至潮州海岸是以即從筠門嶺遞至江西省前進等因查江西交界至筠門嶺本非驛路先因孫士毅駐劄潮州府辦事一切文報若照常由廣東省城轉遞路徑紆迴惟于筠門嶺至贛縣驛站大路止計程六百三十里暫設臺站六十四處深山小路不能馳馬募脩人夫按程接遞在案現今軍營報匣既有從筠門嶺一路遞到者誠恐交冬風信不常

復有船抵潮州海岸經由此路遞到之報匣且正值福康安統領大兵一舉蕩平之時驛遞奏章更闕緊要該處新設之站雖經分段派委雜職文負專司管理但重山複嶺道路綿長若無駐彼總理之員不足以資稽查而明慎重酌委署贛州府通判徐寶麟贛州城守營都司石致遠馳赴筠門嶺一帶駐劄督率稽查遇有軍營報匣加緊馳遞并飭按察使額勒春督率該地方官添募壯健人夫

在站伺候以期迅速不致稍有遲悞一俟凱旋即
行停撤奏入報

聞

二十三日

丁亥

李侍堯奏言聞李化龍已到鹿仔港

該二鎮面商定議李化龍留在鹿仔港駐守普吉

保帶領粵兵二千浙兵五百漳兵二千泉建兵一

千定于初六日起程由西螺進攻斗六門查南北

兩路半年以來俱係堵禦並未進勦而斗六門南

接諸羅北通大里杙尤為賊匪往來要隘今普吉保因粵兵漳兵已到即統領前進及鋒而用必能得手而諸羅之南現有蔡攀龍等打通道路恒瑞又統兵三千前往剿殺是兵力已俱集諸羅一帶不日定當會合進攻賊巢至北淡水為大里杙之背調兵一千由五虎門出口往徐鼎士處接濟八月十五日已經放洋嗣因各船在洋遭風有漂泊各口岸者今到淡已有七百餘名查徐鼎士處本

有兵一千八百名食糧民番七八千名今更得此
兵一到聲勢益壯是以臣飛飭該副將星速進攻
以期乘虛搗穴勿得稍有觀望再查本年正月
中柴大紀自府城領兵克復諸羅時係由陸路進發
後于何時梗阻之處並未見各官稟報第查四月
中常青遣叅將潘韜帶兵赴諸羅協守時因陸路
不通改由海道坐船進鹽水港至鹿仔草上岸陸
行二十餘里始至諸羅是四五月間府城至諸羅

已不能從陸路直達惟鹽水港鹿仔草兩處有柴
大紀所派遊擊揚起麟邱能成等分兵駐守是以
水路尚無踈虞嗣後魏大斌田藍玉張萬魁及蔡
攀龍等四次前往應援諸羅之兵俱由府城乘舡至
鹽水港而鹿仔草至諸羅之陸路二十餘里則已
俱為賊人佔據非復如潘韜前往之時尚無阻碍
魏大斌等赴援與賊接仗即在此二十餘里之內
此外委段昭明等賫回柴大紀之摺想久在鹿仔

草守候迨魏大斌等進兵時隨同前往被賊殺害
以致遺失至崇大紀送出之奏摺文報多係催募
社番從間道黑夜到鹿仔草轉遞其文書率係小
字密封大僅寸許尚易得出至夾板奏摺益難賫
送是以五月二十三日之摺至六月二十日方至
廈門六月初八日之摺并至七月十九日始行到
廈昨又據楊廷理稟稱六月初三日崇大紀催社
番三人到郡內賫摺一人被賊冲散人摺俱失惟

二人得至等語則崇大紀文報遺失者必多惟

皇上所頒諭旨皆係遞到臺灣郡城再由鹽水港鹿仔

草轉遞從前路既未通揚起麟等必不敢輕率遞

送昨蔡攀龍揚起麟等已于八月二十日殺入諸

羅二十二日又行殺出是道路已通自必賫交崇

大紀矣至內地發往臺郡之

諭旨及緊要文書從前係由廈門同知遣家人衙役等

配舡投送臣以事關緊要惟恐復有差失特派佐

雜千總八員轉流更替押送臺郡所有此次交臣
轉寄崇大紀之

旨已派委弁賁送查蔡攀龍等既打通諸羅道路恒瑞
又領兵三千前往自必將沿途賊匪更加勦洗可
無虞梗阻奏入

上命軍機大臣傳諭福康安常青李侍堯崇大紀蔡攀
龍曰本日李侍堯之摺係九月初十日拜發朕意其
時福康安早應行抵廈門與李侍堯會晤定期配渡

何以摺內並未提及再自府城至諸羅陸路未能直達鹽水港鹿仔草兩處有柴大紀所派楊起麟卽能成等分兵駐守是以水路尚無阻隔蔡攀龍等得由海道前往援應諸羅打通道路此皆由柴大紀能先時籌及預行派員駐守何以常青並未能籌及由府城派委官兵前往防守耶至恒瑞帶領多兵由海道繞往轉避賊鋒非懦怯而何前諭福康安于抵諸羅時查明叅奏但此等情節朕于披覽奏章之下其功

罪已屬昭然何待查奏始能明乎朕歷年辦理軍務
于萬里之外時刻留心今恒瑞之畏蒞無能情節顯
著即令恒瑞將来自行陳奏亦屬無可置喙此事原
不待福康安再行查詢也



欽定平定臺灣紀畧卷三十七